

## OKENDO ILEZKORRARI.

Zeruetan jarri albanezake  
Gaur Okendoren izena,  
Biotz guztitik jasoko nuke  
Alderakedan geiena;  
¡Baña zer lana au neretzako!  
Ezageraz naiz laburra .....  
Bear bezela ondo neurtzeko  
Bere kondaira ederra.

Ogei ta zazpi urte zituala  
Zan Gipuzkoatar azkarra,  
Etsaiak larri artzen zituana  
Eman ezkeru upada.  
Betiko ondra Españolarena,  
Ichasoetan bakarra  
Eta munduan bere aomena  
Odoiaz goiti dagoana.

¿Zenbat ibilli eta jazarra  
Cadiz-en eta Lisboa-n?  
¿Errendituak zenbat gudari  
Antonio-ren menpean?  
Asko alditan Olandesak  
Eta mairuen artean,  
¡Beldurra zer zan inork ez jakin  
Okendotarren biotzean!

Kantauriako ontzi guztien  
Agintari zan Okendo  
Ibiltzen zana ichasoetan.  
Aizea bezin agudo;  
Ala juantzan Brasil-aldera  
Donarioz ta garboso,  
Esanez *«goazen, etsaien billa,  
Diran lekuan eraso.»*

«Ara nun dauden, esaten zuan,  
»Eman deiogun arpegi .....  
»Gogor!... bakoitza bere lekuan,  
»Su! su!... ill arte ez etsi!  
»Ez oraindikan, ez du etsaiak  
»Nere bizkarrik ikusi,  
»Agertuko da jazar ondoren  
»Emen zein geran nagusi.»

Asi ziraden sutari bertatik  
Eta Anspater aundiak  
Eraso zion gogor albotik. ....  
¡Orduan ziran larriak!.....  
Baña Okendo beti azkarrak  
Oso suturik begiak  
An ekin zion, su eta garraz  
Zati egiñez ontziak.

Olandesak an, estu artuak,  
¡Larritasunak an ziran!...  
Geienak cheatu, erre ta ito  
Itchasoaren erdian!  
Ontziak ere su artu zuten  
Ondatutzeko zorian,  
¡Okendo bera zan errukitzen  
Naibagetasun aundian!

Ala dakite gizon biotzdunak  
Errendituari barkatzen,  
Egin au bera, bai, Euskaldunak,  
Gudarik bada izaten:  
Izan gaitezen danok anaiak  
Eta alkartu gaitezen,  
¡Oh! ez ibilli, Euskal leialak,  
Lurrak odolez estaltzen.

Izanagatik garailaria  
Arrotasunik ez zuan,  
Ala zan gure gizon aundia  
Jazar lekuan berean.  
Burua zutik, begiak argi,  
Eta ezpata eskuan,  
Ematen zuan beti arpegi  
Argidotarren moduan.

Fededun ona beti izana,  
Eta gudari aundia,  
Jainkoak deitu zuan beregana  
Gizon ilezkor argia.  
Alabatua bere izena  
Gaur zeruetan jarria,  
Bere gloriiaz betezuana  
Betiko Euskal-Erria.

JOSÉ M<sup>a</sup>. DE IPARRAGUIRE